



OLE SULU SAMOA



EKALESIA FAAPOTOPOTOGA KERISIANO SAMOA
OLE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

OLE SULU SAMOA

OKETOPA 2014

email: sulusamo@cccs.org.ws -Main Office: Ph. 24414, Ext 30 - website: www.cccs.org.ws

O le Pese Savali a le 'Au Kerisiano

Pepa mai le Mafutaga Faafouina
a Faifeau ma A'oa'o 2013

Saunia e
Si'u Vaifale

Ua masani Kerisiano i le
faaaogaina o le gagana ma le
faaata o taua (imaging of war),
e faamatala ma faamalamalama
ai le mataupu i le tagata

Kerisiano. E le fou i le faalogo
i lauga a faifeau o le EFKS ma
isi, le faaaogaina o ata o 'autau,
o au'upega ma ofutau e
molimoli mai ai se feau. Ua iai
faaaauau itulau e 2



O Suesuega i le Tusi o Mareko

Saunia e
Fuaao Fetalaiga Fuimaono
faaaauau itulau e 15

**O le Mafuaaga
o le Pese:**
“When the Roll is called
up yonder”

faaaauau itulau e 13

**Faaliuefuefuina
o Tino Maliu**
saunia e
Faapaia T. Tariu FS
faaaauau i le itulau e 8

O nai tamaiti ua aulelei i le taeao o le latou Lotu a Tamaiti i lo latou falesa EFKS i
Maasina, Fagaloa. O le lotu afiafi, na lolotu faatasi ai le EFKS, Katoliko ma le
Metotisi, e pei ona ua masani ai nei lea alalafaga. Oloo tausia le auloto lenei e le
Susuga Laupama Solomona Tokan ma le faletua ia Vaitoomuli.

la Manuia Outou Matua ae ola matou le Fanau

O moomooga lava ia o nai a tatou fanau e fia sefulu afe na
alalaga ai i totonu o malumalu i Samoa i lo latou Aso Sa o
Tamaiti e pei ona masani ai. (silasila itulau e 12)

O le Pese Savali a le 'Au Kerisiano

mai le itulau muamua

i le Tusi Paia a'oa'oga a Paulo e faaaogaina ai ata faapenei (ofutau, puloutau, talipupuni...) Efeso 6:10-18.

E talanoa loa i taua, o se vaaiga masani i fitafita ma vaega'au, a latou 'alaga o taua (war cries) e faaleoina ma usu ma aga'i i taua. Peiseai, ua faafoliga faapena le siva tau a le Manu Samoa ma le haka a le All Blacks. Peisea'i o ni pese/alaga a fitafita e faatupu malosi a o aga'i atu e tau le taua. Atonu o le alaga ma le pese a fitafita ta'ito'atasi, ma le maopoopo o leo o se autau ua sosoo faatasi, e faatupu malosi lea mo fitafita uma. E faatupu ai le loto nuu, e faalototele.

E manatua ai Aso Tofi o taaloga kirikiti i Malua pe a uma le tauvalaauga i le Fale Mafutaga, ona solo lea o 'au aga'i atu i ga'uta i le malae ma taufai lagi a latou pese savali. Peisea'i e faamalosi'au ia pese savali ma faatupu malosi ai mo a'oa'o i taaloga.

Tautinoga a le Ekalesia (Creeds of the Church)

O 'tautinoga' poo creeds a le Ekalesia, ua ta'ua e John H. Leith, o le isi ona uiga o 'pese savali' ia a le 'Au Kerisiano, e usu ma savali i le vaotuitui o faigata aemaise taimi e feagai ai ma sauaga. "Creeds have served as a battle cry... The early church found them helpful in times of persecution....in this sense, a creed is a marching song." O le isi lava lea ta'u o le talitonuga Kerisiano, o le 'talitonuga faa-ta'utinoga' (a

creedal religion).

O le 'ta'utinoga' o le faa-Samoaina lea o le upu faa-Peretania 'creeds', e sau mai le upu Latina credo - 'ua ou talitonu' - *I believe* which means "*an authoritative statement of the main articles of the Christian faith to which believers are expected to assent.*"

O le tautinoga lauiloa a le Ekalesia Aoao, ua masani ai foi le EFKS, o le Tautinoga faa-Aposetolo oloo lomia i le pito i tua o lana Tusi Pese.

Ta'utinoga ma ona taua mo le Faatuatuaga. (Creeds and their roles in religion).

(i) O Kerisiano ta'utino, o Kerisiano e puipui o latou talitonuga (defending Christians).

Soo se fitafita lava a se malo, o lona faamoemoe ina ia malu puipuia le malo mai ona fili. Peisea'i e faapea se tasi o agaga taua i le fatufatu mai ai o tautinoga. O taimi o lu'itau sa fesoua'iina ai le talitonuga faa-Kerisiano i aso o le uluai Eklesia. eg. - (Arius ma lona talitonuga o Keriso e le se Atua, ma e le aupaga faatasi ma le Atua. O ia o le foafoaga aupito mauluga/highest creation of God). O lafoga ia na tula'i ai le lotu Kerisiano ma puipui lona talitonuga ina ua fatuina se tasi o ana talitonuga autu, le Nicea (325).

O le fono lea na latou puipuia le talitonuga, "O Iesu Keriso o le Atua lava ia. O Iesu Keriso o le tagata foi o ia."

(ii) O Kerisiano ta'utino, o Kerisiano mafaufau (thinking

Christians).

O le iai o tautinoga i le Ekalesia, e mafua lava ona o se tasi o natura o le tagata soifua, o le tagata mafaufau (a thinking being) na te mafaia ona faamatala lona faatuatuaga, ina ia manino i le tagata lava ia, le autu tonu o lona talitonuga. E le faatuatua pogisa ae faatuatua lava le malamalama i le faa-autu o lona faatuatuaga. O lona uiga o tautinoga o se gaoioiga (action) faa-mataupu silisili e faaaogaina iai le mafaufau ina ia malamalama. A tupu le malamalama e tupu ai le loto atu i le Atua (commitment). Ta'ua e Leith, o e loto atu i le Atua e aunoa ma le mafaufau, e mata'utia ma le magafagafa.

(A commitment that does not serve God with the mind is always dangerous and irresponsible). O le aotelega o lea manatu, pei foi ona taua tele le loto (heart) i le auaunga a le tagata, e taua tele foi le faiva a le mafaufau (mind) aua o le mafaufau ua afua ai le tautinoga. O le saga mafaufau pea ma saga mafaufau pea la o le tagata (i le Atua), o se faailoga foi lea o se tautinoga e faia pea, ma o se mataupu silisili gaoioi ma ola.

(iii) O Kerisiano tautino o Kerisiano o le 'manatua' (remembering Christians)

O tautinoga a le Ekalesia e le na o ni fuaiupu e a'o faatauloto ma faaleo i taimi o sauniga.; a o upu oloo molimoli ma afifi ai pine faamau o faiga a le Atua i le talafaasolopito, e ao ina le gallo. Eg. E iai le manatu faa-faaauau itulau e 4

OLE LAUGA

**Saunia e Maselino Sului FS
EFKS Fugalei**

Manatu Autu:

O auega a matua: O le a sau tali talavou?

(Faapitoa mo lenei masina o Oketopa - ASO SA O LE FANAU)

Tusi Faitau:

F/Tuai: 2 Samuelu 18:24-33.

F/Fou: Ioane 6: 3-13

Matua: 2 Samuelu f33: Lo'u atalii Apisaloma e.....

A oo ina uluulu le alofa faamatua, ona faigata lea ona toe vavae, ma e leai se malosi e toe liliuina. O le alofa e toto'a'ano ma e oo lava i le oti....e le fo'i. E talitonu e afua ona o le sootaga i le uso ma le fanua o le toala fanau. Atuutuu pea le vaai i le loloto ona faapea lea - O ai se tasi na te toe teena lona lava tino, ivi ma aano? A afaina le atalii poo le afafine, o le afaina lava lea o matua.

O i'uleo o le tagi lotulotu o Tavita e pei ona faamauina i le fuaiupu 33, o 'ina oloo taoto ai lea lagona faamatua.....le ootia faatama. Ua oo lava i lona ola, ua o se meanoa, ua sili ia Tavita pe ana oti ae ola Apisaloma lona atalii.

Ua le manatu Tavita i le atalii leaga, ma le faufau ia oti o ia. Ua mama ia Tavita lona tulaga o ia o le tupu ma le faamoemoe o le malo oloo i ona lima, peitai ua sili lona alofa i lona atalii. Se mea ina a leaga o le tausia tau mai ua ola ma malosi, ae o lea ua toe faasaga tau mai. E tala tuu mai pe ana mamao se

sootaga, ae paga lea, o le atalii, ua faasaga tau i le tama.

Fai mai toe upu a Tavita i ona ta'ita'i'au o Apisai, Ioapo ma Itai oloo faamauina i le fuaiupu e 5: "Ia outou agamalu i le taule'ale'a o Apisaloma ona o a'u...." Se'i faauta!, tiga ona iloa e le Tupu o Tavita o lea ua sauni lana autau e faafetaia'i Apisaloma ma lana itu, ae toe momoli atu lenei feau. E le faigofie i alii nei ua tofia e ta'ita'i'au. O le a o e sauni i le taua, ae toe fai mai lenei fanoga e uiga i lona atalii....e mafai ona faapea, i se isi ona faauigaga, e o e ave o latou ola i lima o Apisaloma. E faapefea ona agamalu ia Apisaloma, o le fili lea o le a latou feagai?

E mafua lea manatu o Tavita ona o le ALOFA faa-tama. A toe silasila i le tasi itu o lenei tala, o se mea toilalo le sola ese o se tupu. O lea ua tuua lona tulaga faa-tupu ae alu ese. O tagata sa ia te ia ma nisi mea taua o le malo ua oo lava i le atolaau ua aveese ma tiliola ona o le aga'i mai o Apisaloma ma ana 'au, (pei ona faamauina i le mataupu 15-17)

Talofa ia Tavita o le tupu faauuina, ua fesolasolata'i peisea'i ua leai sona faamoemoe. E ui ona o le manu'a mai fale, ae sili ona oona, ona o lona lava toto, ua fia fasioti ia te ia. O se tulaga toilalo o le nofo atu o le tupu i le malo ae oloo fafau e le atalii le upega e maileia ai. Ua le toe nanea se upu a le tupu o lea ua

toe pu lava le vaa ia Ti'a. Paga lenei alofa ina a tele.....

Le fanau e, ua tatou iai i lenei vaitau o le saoasaoa o le taaviliga o le lalolagi. E le toe tau nanaina aafiaga ua oo i ai tupulaga talavou. Ou te fesili atu, o leo tele i la outou faalogo le tagilotulotu a le toeaina o Tavita i le alofa i lona atalii? O le a sou lagona i le tagi aue faamatua, tainane oloo saili Apisaloma e fasioti ia te ia? Fai mai e malu le tama i lana fanau poo lona atalii, ae ua a nei? Ua le tua le upu a Tavita. O Apisaloma o lona atalii e tatau ona lagolago ma tapa atu iai i le tautuaina o lana nofoaiga. Ua siliga tali i seu, se tali mai a le atalii, ae ua na o le pelu ua sasau i le tama.

I le tala a Ioane i le fafagaina e Iesu o le motu o tagata e ala i le vavega na ia faia i i'a iti e lua ma areto karite e lima, oloo taoto ai se aoaoga taua. I lenei faamauga oloo taua ai e Ioane e faapea, o i'a ma areto a le tama, ua le maua lona igoa. O le masani a tina e tapena meaai a latou fanau e pei o falaoa, ia ma se faguvai ona o lea ma i latou, aemaise pe a iai ni mea tumutumu e lolofi iai tagata e matamata ai, pei foi o le taimi o Iesu i ana aoaoga ma vavega faapea le faamaloloina o ma'i. E talitonu o i na ala atu ai le tama lea ma lana meaai (lunch) na tua iai le motu o tagata fia aai.

Ioe, le fanau e, o le a sou lagona pe a tapa atu ia te oe mo se fesoasoani 'a 'e tali mai? Le tama ua tali i le manao o le toatele o tagata, e ui ina itiiti ae na faateleina e Iesu.

E ui ina e le o iloa le igoa o le

faaauau itulau e 4

O LE LAUGA

tama, ae silia ma le lima afe ma ‘ato o toega o taumafa e sefululua le faitau aofa’i o ona igoa. Aisea? O le aofai lena o e na tua ia te ia, ma ‘ato o toega o taumafa, e toe tua foi iai nisi tagata i le lumana’i. Tama lelei ia e tua atu iai tagata, ma le tama leaga o Apisaloma faufau leaga.

Le fanau e, o le mea moni, poo fea lava tou te aga’i iai e mulimuli atu pea le alofa faamatua. Pe faaeaina oe, ia e iloa oloo iai faatasi ma ou matua. Pe oo foi i se tulaga e te toilalo ai ma oo atu i puapuaga, ia e iloa oloo toilalo faatasi ai ma i matou nei o matua.

O le alofa e mafua ai loimata o uega, e moomoo ai ina ia oti e suia outou. E toafia ni tupulaga ua toe faufau le leaga i o latou matua? Ua maua le poto ma le faaeaina ona manatu lea ua atoa ia te ia mea uma. O le ala lena na taumafai ai

Apisaloma, ua ia taumafai e faaliliu loto o le nuu ia te ia, ua ia manatu e maua le lagolago a le nuu e faigofie ai ona faatoilalo le malo o lona tama. Ua fia vave ona saofa’i i le mamalu ma le faaeaea a tagata i se ala leaga ma le inosia.

E mata’utia le iuga o lea taumafaiga, na tautau i le va o le lagi ma le lalolagi, ua fili lona laulu e la o le tapeneto (laau). E mafai ona faapea foi, o soo se talavou e taumafai e mulimuli i ala o Apisaloma, o lona iuga foi lea. A oo ina tutupu ni tulaga faapea ia te outou le fanau e, ona matou fetagisi faatasi lea ma Tavita ma lagona le fia oti e sui ai outou.

Matua e, malo le galulue, ua le toe faigofie lenei vaitau, ua matua eseese mamao ma le 15 tausaga ua mavae. O la tatou galuega e tumu i faigata, e le oge ma mafatiaga, ae o le tuualalo i

lenei masina ua faatauaina mo le fanau, aua le tuuna lo tatou tofi. E ui i puapuaga na feagai ma Tavita, e le’i uma le alofa faatama (faamatua). O le tagi lotulotu a Tavita e afua mai le loto, na te lei faamele lona tofi mai le Atua. E moomia le tagi e afua mai le loto, e fia avea le ola e sua fanau..Ua to’afia ni fanau ua le malu i tama.....ua toafia ni fanau ua sauaina ma faia iai uiga mataga e matua.....O le feau o lenei Oketopa, ia avea lou ola tama ma tina e sua le ola o fanau i totonu o puapuaga ua fetaomi mai. ‘AUA tatou te fiu, ‘aua le solomuli.....aua le faavaivai....O le Alii e fesoasoani mai.

Talavou, o le a sau tali i uega a matua? Ua e sauni e tua atu ia te oe nai ou matua i lenei masina a o lenei foi tausaga?

Ia manuia lenei masina ua faatatauina mo outou, faapea le alo atu i su’ega faaiu o lenei tausaga. Amene.

O le Pese Savali a le ‘Au Kerisiano

mai le itulau e 2

Lutheran - Lotu Luteru, e tolu ni vaega taua o le tautinoga faa-Aposetolo e ao ina manatua ai pea.

Vaega muamua: e manatua ai le Atua foafoa (creation). *Ua ou faatuatua i le Atua le Tama, o Le e ona le malosi uma lava, o le na faia le lagi ma le lalolagi.*

O le a le uiga o lea vaega? Ua ou faatuatua ma talitonu o le Atua na faia a’u ma mea uma ua iai, ua ia umia (sustain) foi lo’u tino ma lo’u agaga ma ua na fafaga, leoleo ma puipui ia te au i lona lava malosi. O le

Atua foi o le ou le malosi uma lava ma na faia le foafoaga, o le Atua lena ou te talitonu ma faatuatua iai.

Vaega e lua: e manatua ai le Atua (Iesu), na faasaoloto/ faasaoina a’u. (redemption).

“Ua ou faatuatua foi ia Iesu Keriso o lona Alo e toatasi o lo tatou Alii. O le na fanaua e le Agaga Paia, na fanau mai ia Maria le taupou. O le na puapuagatia i le pule a Ponotio Pilato, sa faasatauroina, sa maliu, sa tanumia. Na oo ifo i Seoli, o le aso tolu na toe tu mai ai nai e ua oti. Na afio a’e i le

lagi, oloo ua nofo o ia i le itu taumatau o le Atua le Tama, o le e ona le malosi uma lava. O le a toe afio mai o ia e faamasino i e ola atoa ma e ua oti.

O le a le uiga o lea vaega? Ua ou faatuatua o Iesu, o le Atua moni, o mea uma foi na oo ia te ia, ua na faasaoina mai ai a’u mai le oti ma le malosi o le leaga, ina ia avea/faia a’u mo ia, ma auauna ia te ia i le ola faavavau. O le faaleoina la o lea vaega o le tautinoga, e faamanatu mai ai, ana leai le Atua na faasaoina mai au semanu o penei lava o fai ma pologa a le agasala ma le faaauau itulau e sosoo ai

MATINI LUTERU

1483 - 1546

O le Auupega o le Toe Fuata'i

faaauau mai le masina o Setema

Faafesaga'i ma le Fili i Worms

O nei tusitusiga a Matini Luteru, e pei o ni faailipu leo tetele i taliga o le pulega o le Ekalesia i Roma, aua ua faasagasaga atu nei Matini e lia'ina i luga ituaiga talitonuga ma amio faatevolo ua tele seneturi o ola i uiga ma mafaufauga o tagata. E ui lava o le tusi lona lua a Matini ('On the Babylonian Captivity of the Church') na tusia mo tamalii o Siamani, ma e na o Siamani lava

na faasalalau ai, ae na i'u lava ina lauiloa uma e tagata o Europa. E oo i le tupu o Henry VIII o Egelani. Na matua ita tele ai lenei tupu ma ia tusia ai ni faaaliga tetee i mea na tusia e Matini i lea tusi, ma matua faasaga tau ai o ia ia Matini i lona olaga atoa.

A o tau filifili ta'ita'i o atunuup e o le a le mea e fai ia Matini, a o le taimi foi lea o tau filifili ana lava uo mamae pe o fea le itu e 'au ai i nei fe'ese'esega. Sa tutumau pea le lagolago a nisi o ana uo, a o isi sa faalotolotolu. O se tasi o uo a

Matini sa lagolago malosi ia te ia, sa matua vevesi lona mafaufaau i talitonuga ua faaalia e Matini, ua tago ua togi le tusi i lalo ma lona ita tele, ae na toe tago atu i le 'u'u mai le tusi, ma toe faitau. Na oo ina ia talitonu e pei o isi i mea o fai mai ai Luteru, ma ia faapea ane, "sa tauaso atoa le lalolagi i nei mea ua faaalia."

Sa iai se isi taumafaiga na fai e tau taofiofi ai faasalalauga sa fai e Matini Luteru, i le fono faale-tausaga a faamasino o le malo i le aai o Worms i le tausaga e 1521. Na amia ai Matini e alu atu e tali i ni tuuaiga o fai aga'i i ana tusitusiga. Sa ta'ita'i i lea fono le emeperoa poo le tupu. O le finagalo o le tupu o Feterika ia ave pea le

faaauau itulau e sosoo ai

O le Pese Savali a le 'Au Kerisiano

tiapolo.

Vaega e tolu: E manatua ai le faamamaina (sanctification)

Ua ou faatuatua i le Agaga Paia. Ua ou faatuatua i le Ekalesia paia e aofia ai nuu uma, i le mafutaga o le 'Au Paia; ma le faamagaloina o agasala; ma le toe ola mai o le tino o le tagata; i le ma le ola e faavavau. Amene.

O le a le uiga o lea vaega? Ua ou faatuatua e le mafai e lo'u malosi ma lo'u mafaufaau ona ou talitonu ai i le Atua, ae ua ala lava i le Tala Lelei (gospel) le valaaui o a'u e le Agaga Paia ina ia faamalamalamaina a'u e uiga i ana meaalofa ma lona faamamaina o a'u, ma mea e oo ia te au i le faatuatua.

O 'manatu' ia e tolu ua faataua e lenei pepa, ua mafua ai ona fia faatalanoa lenei mataupu e

uiga i le Tautinoga faa-Aposetolo, aemaise o sona sao taua i le faamanatuina o mea na mo le tagata faatuatua.

Folasaga:

Ia toe faaoalaola le 'anava tau' a le 'Au Kerisiano faatuatua e ala i ana creeds/tautinoga. Peisea'i o le matau a le pepa, ua iai mataupu (issues) o le sosaiete ua foliga ua maalilili ai le 'autau a Keriso, ma ua vaivai ai le peseina o le pese savali a le 'Au Kerisiano. Eg. same sex marriage, (ulugalii tutusa - tama ma le tama poo le teine ma le teine), human rights, WTO ma ona aafiaga o le sosaiete.

Ia faaleoteleina le alaga "Ua ou faatuatua i le Atua le Tama....Ua ou faatuatua ia Iesu Keriso.....Ua ou faatuatua i le Agaga Paia.....". Faamanatu

leotole o le Atua na foafoa, o le Atua na faasaoina, o le Atua na faamamaina a'u le Kerisiano, e leai se isi talitonuga e sili atu nai lo lena. E leai foi se isi manatu e ao ona faamuamua nai lo lena.

Faalauteleina o Manatu

O tautinoga lava ia a le Ekalesia faato'a tula'i mai ina ua tuana'i le seneturi lona tolu ma le fa (tausaga 200-400 talu ona fanau mai le Alii Faaola). Peitai o totonu o le Tusi Paia oloo iai ta'iala (themes)sa faavae mai ai. eg. Oloo iai i le Teuteronome 26: 5-9 le faatonuga mo le Israaelu pe a na maua le fua o le eleele na foa'i atu e le Atua mo ia. Na te avatu le fua mo le Atua ma na TAUTINO atu: "O lo'u Tama o le Suria ia na fai a oti, ona

MATINI LUTERU

avanoa ia Matini e faamalamalama ai ona talitonuga. O Feterika foi o se tupu sa talitonu e tatau lava ona tuu le avanoa i le tagata e faaali ai lona manatu i mea ua tuua'iina ai o ia. Na matua fiafia ai lava Matini i le avanoa ua tuu mai e faamalamalama ai ona talitonuga, peitai na vave lava ona ia iloa e ese le mea o faamoemoe iai le fono.

O le tupu o Salesa V o Sipaniolo e matua le manao lava e maumau le taimi ia Matini. O le mea lea, na matua puupuu lava le fono. Na ona tusi atu lava o sui o le fono i le faaputuga tusi i luga o le laulau, ma fesili ia Matini pe o ia na ia tusia ia tusi, ma afai o lea, e toe fulitua i ona talitonuga o

tusitusia ai i nei tusi pe leai.

Na faatalitali le fono ma le manatu o le a tali vave atu Matini, ina ia faaauau ai le fono i isi ana mataupu. Ae le'i mana'o Matini e i'u ai i le taimi lea lenei mataupu. Na ia talosagaina se taimi faaopoopo. "O le mataupu lenei e oo atu i le Atua ma lana Upu. O le mataupu lenei e aafia ai le faaolaina o agaga. Ou te talosaga atu ai ia te outou, toe aumai se taimi ou te tali atu ai."

Ona tuuina atu ai lea o le aso e tasi. Na alu lena po o mafaufau o ia i le fesili na aumai, ae ui lava i lea, ua leva ona uma ona fai le faaiuga a Matini i lenei mataupu. O le aso na sosoo ai na tu ai o ia i luma o le fono. Na fesili se sui o le

fono, "Aumai se tali faigofie ma le manino. E te faafo'i au upu ma ou talitonuga o tusia i nei tusi?"

Na tali atu Matini Luteru i lea fesili e faapea, "Vagana ua faatonuina au, ma ua ou mautinoa ni faamaoniga mai Tusitusiga Pa'ia, poo nisi mafuaaga manino ua tuuina mai, ou te le talia ai le toe faafo'i o au upu ma o'u manatu o faaalia i nei tusi. Aua e le sa'o ona e faia se mea e te tetee atu ai i ou lagona moni."

"O le mea lea, ou te tu atu ai i o outou luma, ma ou faapea atu, e le mafai ona ou faia se isi mea. Fesoasoani mai le Atua ia te a'u! Amene."

O se Faaaliga Aloa'ia mai le aai o Worms

Ua faamaonia nei tuuaiga o Matini Luteru, ae ua tuuina atu

O le Pese Savali a le 'Au Kerisiano

alu ifo ai lea o ia i Aikupito.....ua avea foi ma nuu tele,.....ona agaleagaina lea o i tatou e tagata Aikupito....ona tatou alalaga atu lea i le Alii le Atua o o tatou tama, na faafogaga mai foi o le Alii i o tatou leo.....ona aumaia lea o i tatou e le Alii nai Aikupito i le 'a'ao malosi ma le 'a'ao faaloaloa, atoa ma mea mata'utia tele, ma ua foa'i mai ia i tatou lenei nuu, o le nuu e tafe ai le suasusu ma le meli."

I le iloiloga/tauvaga sa faia e Elia ma perofeta a Paala ma Asaira i le mauga o Karamelu e iloa ai le Atua moni (1 Tupu 18), ina ua muamua perofeta a Paala peitai e le'i mu la latou taulaga, ona talosaga lea o Elia i le Atua ma auina ifo ai le afi ma mu ai

lana taulaga. A o molimauina e le nuu lea mea mata'utia, o le f.39 oloo iai la latou TAUTINOGA. "Ua iloa e le nuu uma, ona faapa'u'u fao ai lea o i latou, ua faapea, "O le Alii, o le Atua ia; o le Alii o le Atua ia."

Ua lauloa foi le *shema* faa-Iutaia (Teut. 6:4:) "Isaraelu e, faalogologo mai ia, o le Alii o lo tatou Atua, o le Alii e toatasi lava ia."

O le Feagaiga Fou oloo iai le fesili a Iesu i ona soo poo ai o ia, (Mareko 8:27). Ua faailoa ane tali a nisi - "ona tali mai lea o Peteru ia te ia, "O oe o le Keriso". (f.29). Peisea'i se tautinoga foi si na mea. O la Paulo, Roma 10:9: "afai e te TAUTINO i lou gutu i le Alii o

Iesu, ma faatuatua i lou loto ua toe faatuina mai o ia e le Atua nai e ua oti, e faaolaina ai oe."

E leai ni tautinoga aloa'ia a le Eklesia oi le Feagaiga Fou, ae sa feagai le Eklesia ma le molimau atu e ala i ana lauga, pesega, tatalo, papatisoga, faamalologa ma nisi faiva. O ia mea uma, na amatamata malie mai ai ona faatulaga ma faataatia ana talitonuga faa-Kerisiano (Binitarian & Trinitarian) ma ana tautinoga. O nisi o a latou auega "O Iesu o le Alii", "O Iesu o le Keriso", o nai i'uleo ia faatautinoga sa fai ma ta'imua mo ta'utinoga ma'oti a le Eklesia na mulimuli mai.

O le Tautinoga faa-Apostolo
E iai le talitonuga o le tautinoga faa-Apostolo e le'i

MATINI LUTERU

ai foi ma se avanoa e tuua ai ma le saogalemu le aai o Worms ae toe foi atu i Wittenberg.

O le faaiuga aloa'ia mai le fono i Worms, o se iuga sa faatalitali iai le pope ma lana pule'aga. O lenei la ua faamaonia tuuaiga o Matini faapea o lona faia o aoaoga sese e le tusa ai ma talitonuga o le Ekalesia, ma ua avanoa ai foi ma soo se tagata na te fia fasioti ia Matini e aunoa ma se faasalaga e faia iai i lea tagata. A na iai lava se avanoa e mafai ai e Roma ona susunu olaina ai o ia, ua faia ia te ia e pei ona faia ia Ioane Hasi.

O le faaaliga aloa'ia mai le aai o Worms, ua logoina ai nei Matini e faapea o ona talitonuga o se pala o otaota leaga, ma ua faasaina ona faasalalauina i soo

se atunuu o pulea e le malo. Ua faasaina foi soo se tasi na te lomia, faatauina atu, pe faitauina nei tusi. Ua faasaina foi faale-tulafono ona toe fesoasoani se isi ia Matini Luteru i soo se auala lava.

AE ui lava i nei faasasa e tele, ae na maua lava se avanoa o se uo a Matini e fesoasoani ai. O ia lea o Frederick the Wise. Ua ia taupuleina ina ia faataga pu'eina ma saisai Matini, ma ave faanana i se tasi o ona maota i Wartburg. E sefulu masina o lafi ai i lea maota Matini. Ua faatutupu lana 'ava, faatutupu lona lauulu, ma ua faaigoa o le "Toa o Siaosi". E oo lava i se tasi o uo matua lelei a Matini na te le'i iloa o ia ina ua tatala mai ma le maota, ona o le uumi o lona ulu ma lana ava na

nanaina ai ona foliga.

E le'i fiafia o ia i le taimi na nofo ai i le maota i Wartburg. Na ia tusi ai e faapea:

Na ou iai i lo'u falepuipui i lo'u motu o Patamo, i luga o le maota i le malo o manulele, sa tofotofoina ai a'u e le tevolo. O le faatuatua na ou mafai ai ona ou teteetatu ia te ia, ma tali atu ia te ia i upu nei, "O lo'u Atua o ia lea na faia tagata, ma ia tuuina mea uma i lalo o o latou vae. (Salamo 8:6) Faaa'oa'o la pe a iai sou malosi e sili atu i lo ia."

Sa faaauau pea ana tusitusiga a o iai o ia i le maota i Wartburg. Ma o se tasi o mea aupito sili ona taua na ia faia i lea maota, o lona faaliliuina lea o le Feagaiga Fou atoa mai le gagana Latina i le gagana Siamani. I lea vai taimi e le'i maua lava e tagata lautele le Tusi Paia. O nai fuaiupu sa faitauina atu mo latou i le taimi o le Faamanatuga, sa faia i le gagana Latina. O lenei la o le a sua atoa foliga o le tapuaiga Kerisiano.. O le a maua e tagata lautele le malamalamalama!

mai le tusi: God's Generals,
tusia e Roberts Liardon,
faamatatalaina e
Afemata T. Apelu Aiavao

O le Pese Savali a le 'Au Kerisiano

tusia e Aposetolo, a o se mafaufauga faa-Aposetolo. Peitai ua ta'ua e Geoffrey Wainwright (2003) se talatuu (*a tale*), faapea sa faataamilo lana i le seneturi e 5, sa faamatala ai e Rufinus o Aquileia i sana tusi i 'tautinoga' ma faapea ai, sa tau fai velo'aso uma le ausoo e to'a sefulu ma le lua i le fausiaina o lenei ta'utinoga. Fai mai ina ua sauni le ausoo e taape mo la latou galuega tala'i, ma ua latou talia foi meaalofa o gagana i le Aso Penetekoso, ona latou feiloa'i ai lea e faataatia sa latou maliliega ina ia aua nei feteena'i la latou galuega tala'i o le a alo atu iai. Ao Peteru 'aioso masani foi na muamua oso ane: "Ou te talitonu i le Atua le Tama, o le

na faia le lagi ma le lalolagi".....peiseai o sana tala e faavae i luga o le fetalaiga a Iesu ia te ia (Mataio 16:17): "*Ona tali atu lea o Iesu ia te ia, Amuia oe Simona Paiona, aua e le se tagata na ia faaali atu ai ia te oe, a o lo'u Tama oi le lagi.*

Atonu na sosoo Anetele'a i le faapea ane, "Ma Iesu Keriso lona Alo lo tatou Alii", pe a fua i le tala a Anetele'a ia Simona - "Ua maua le Mesia," (o lona uiga o le Keriso), Ioane 1:41

Atonu e le matua manino lava le afuaga o le Tautinoga faa-Aposetolo. Peitai mo lenei mafutaga, e taua le faamalosia ai o e na mua i malae i le tala'iga.

Mercy and Justice

Only as we bow in contrition, and repentence at the foot of the Cross, can we find forgiveness. There is the grace of God! We don't deserve it! A man said some time ago, "When I get to the judgement of God, all that I will ask for is justice. " My beloved friend, if you get justice, then you will go to hell. You don't want justice. What you want is mercy.

Billy Graham

Faaliuefuefuina o Tino Maliu

(Pepa mai le Mafutaga a le Matagaluega Faleata - Iulai 2014)

Saunia e

Faapaia T. Tariu FS,

EFKS Vailoa Faleata

Ua faatonuina au e le Komiti o le Mafutaga, ou te faia se suesuega mae'a i le mataupu o le ATUALALAINA - EM-BALM, ma lipoti mai i luma o lenei mafutaga mamalu se taunuuga o la'u suesuega. Masalo e iai se fesootaiga o le mataupu autu o le Mafutaga ma lea mea e ta'ua o le Atualalaina, ae ou te talitonu, o le a 'oa ma tamaoaiga la tatou talanoaga i lou faasoa mai. Tau ia ina ou faama'ite atu i nai fesili ia, se'i tau tatala ai le mataupu nei:

FESILI:

1. O le ATUALALAINA - o le a lea mea?
2. O fea na fanau/maua/amata mai ai?
3. O le a le mafuaaga/uiga/faamoemoe o lea mea?
4. E faapefea ona fai?

O le upu moni, e anoanoa'i nisi fesili aga'i i le mataupu nei, a ona o le taimi e 'uti'uti, o lea ua manatu ai ua lava ia fesili - faitau faatasi mai le Kenese 50: 1-3; 25-26:

"Ona faapa'u atu lea o Iosefa i fofoga o lona tama, ua tagi ai i ona luga, ma sogi ia te ia. Ona poloa'i lea o Iosefa i ana auauna foma'i ia latou atualala i lona tama, ona atualalaina lea o Isaraelu e foma'i. Ua atoa ona aso e fagafulu, aua oloo faapea ona faaatoa o aso o e ua

atualalaina; ua tagi foi Aikupito ia te ia e fitugafulu ona aso."

"Ona fai atu ai lea o Iosefa ia tauto mai le fanauga a Isaraelu, ua faapea atu, e asiiasi mai lava le Atua ia te outou, tou te ava'e foi o'u ivi ai le mea nei. Ona oti lea o Iosefa ina ua atoa ona tausaga e selau ma le sefulu, na atualalaina foi o ia e i latou, ma tuu i le atolaau i Aikupito."

1. O LE ATUALALAINA - O LE A LEA MEA?

O le tali tuusa'o ma le faigofie ona malamalama ai e faapea: "O le atualalaina - o se sauniga (togafitiga) e faia i le tino o le tagata oti, e mafai ai ona taofia mai i le manogi poo le pala, ae faasaoina mai mo se taimi umi.

NISI FAAMATALAGA:

O le upu atualalaina - o le upu o le Gagana Samoa, e le o se upu Eperu poo se upu Eleni, o le upu na fatu a'e lava i le Gagana Samoa - e faapena foi ona faauigaina faa-Samoa, ma faamatala ai le uiga o mea e tutupu ma aliali mai i tu ma aganuu a Samoa. O lona uiga, a tatou malamalama i la tatou lava Gagana ma la tatou lava aganuu, ona faigofie foi lea ona tatou manino lelei i le uiga o soo se mea ua tupu, saga tupu, o le a tupu ma aliali mai i totonu o lo tatou atunuu.

Faata'ita'iga:

O le upu ATU:

- i. lagona o le loto ua popole, fefe, tiga, faanoanoa
- ii. o le i'a o le sami
- iii veape - atu - ou te fai atu, taimi ma le nofoaga.

O le upu ALALA -

- i. fafie,
- ii. nofoaga, mea e mau ai, alalafaga, nuu,
- iii. eva i le po, talanoa mo se taimi umi (Tala i le Samoa na galo), Manu'alesagalala

O le upu ATUA - LALA

- i. Atua o le La
- ii. vaevae, faaninii - tau ina vaevae pe faaninii foi - ae aua le aveeseina.

2. O LE ATUALALAINA - O FEA NA FANAU MAI AI?

I le mau na tatou faitauina i le tusi o Kenese, e atagia mai ai o le nuu lava o Aikupito na maua ma amata mai ai lenei mea. O le ta'ua o le atualalaina o Iakopo e foma'i Aikupito, e foliga mai ai o se mea ua leva, fai soo, ma ua masani ai foi foma'i Aikupito.

Peitai, e le mafai foi ona tatou lafoesea, pe faatauagavale i nisi o mau, e pei ona ta'ua i nisi o tusitusiga oloo faapea mai, o le ATUALALAINA, o se tasi lea o aganuu a tagata Eleni, e faia i o latou tagata ta'uta'ua, e pei o tagata popoto, tagata malolosi, ma tagata totoa.

O talitonuga o tagata Eleni, e mafai e le POTO o tagata popoto, o le MALOSI o tagata malolosi ma le TOA o tagata totoa, ona faaumiumi atu le lelei atoatoa o le tino (e le manogi pe pala), seja mae'a aso o le faanoanoa ma aso o ona toe sauniga i luga o le fogaelele ma tuuina atu i o latou tuugamau. I lea aganuu a Eleni, e leai, leai lava se mea e faia i le tino o le

Faaliuefuefuina o Tino Maliu

tagata oti, ae talu ai le maliu o le toa tautaua o Eleni, o Alesana le Sili, na maliu i Papelonia ona tuu lea o lona tino maliu i totonu o le pusa ua tuuina iai i totonu le meli suamalie, ina ia faaumiumi ai le lelei o lona tino, ona e le gata e mamao le nuu o Maketonia e tanu ai, a o aso foi o le faanoanoa ma ona toe sauniga.

3. O LE ATUALALAINA - O LE ALE MAFUAAGA/UIGA/FAAMOEMOE O LEA MEA?

Tasi lenei o mataupu ua fai ma totongalemu o mafaufauga faa-mataupu silisili o tagata Aikupito i totonu o a latou tapuaiga, ona o se tasi o o latou talitonuga - E toe ola mai le tagata nai le oti. O le ala lea e matua faia ai lava ma le faaeteete ma le saunia lelei le sauniga o le atualalaina.

O le atualalaina o tagata i le aganuu a Aikupito, e le gata o o latou talitonuga e pei ona ou ta'ua, a o ni aganuu foi ua faia e talafeagai lelei ma lo latou siosiomaga. O lona laufanua e faalaulautoafa, ma lona tau e matua vevela lava, e matua fesoasoani tele i le faamoemoe lenei o le atualalaina o tino o tagata ua oti.

Sa masani tagata Aikupito ona tanu o latou tagata ua oti i le malala ma le oneone (Esoto 2:11-12). E tuu mamao ese ma le vai o le Naila, ina ia le afaina le tino oti i le manogi ma le pala pe a susu. O lo latou talitonuga, a oti le tagata, ona oti lea o le tino ae ola pea le agaga. E taumafai lava ia faia le sauniga o le atualalaina i le lelei,

matagofie ma le aulelei o le tino, ina ia toe tosina mai ai le agaga. O fea le taimi e toe mafuta ai vaega uma nei o le tagata e pei o lona agaga, lona mauli, le loto ma lona igoa, o le taimi tonu lena o le toe tu mai o le tagata i le TINO. E faavae o latou talitonuga uma nei i a latou tapuaiga i o latou atua.

(i) Tapuaiga i le atua o le La (fafine)

(ii) Tapuaiga i le atua o Seoli (Oisilisi - Osiris)

Atonu e iai nisi mafuaaga o lenei mea ua ta'ua o le atualalaina, a o ni nai manatu na e fesoasoani e tau faamatala ai le mafuaaga, o le uiga, ma le faamoemoe e mafua ai lenei auauanga, e pei ona faatinoina i le soifuaga.

4. O LE ATUALALAINA - E FAAPEFEA ONA FAI?

E eseese lava le faiga ma le faatinoga o lenei auauanga, aemaisae lava e pei ona maua i tusitusiga a nuu e pei o Aikupito, ma tala tuu a Eleni, ae o loo ta'ua mai e oo mai i taimi o Iesu.

1. O le Mau Faa-Eleni. Na o tagata tautaua e pei o tagata popoto, tagata malolosi ma tagata totoa sa faia ai lea sauniga. E leai se vailaau poo se isi lava mea e faia i le tino o le tagata, ua latou talitonu, o lona POTO, MALOSI ma le TOA a o ola, o le malosiaga lena na te taofia le tino mo se taimi umi, mai le manogi ma le pala, vagana ai le mea na tupu ia Alesana le Sili, ua mautinoa ai, ua faaaogaina foi e Eleni mea manogi ma vailaau, e faatino ai

lea faamoemoe.

2. O le Mau Faa-Aikupito. I le amataga, a oti le tagata, ona aveese uma lea i fafo ona totoga, e amata mai lava i le fa'ai, o le fatu, o le mama, e oo lava i totoga o le manava. E talitonu tagata Aikupito, o vaega ia e vave ai tele ona manogi ma pala le tino. E taumafai e faamatu le toto mai le tino o le tagata. A matu lelei, ona avane loa lea o le masima faapitoa, ma nini atoa ai totonu o le tino; e faapena foi i totoga uma nei, e iai lava le masima faapitoa e nini ai foi ma totoga, ona toe tuu lea i totonu o le tino o le tagata oti, ona avane lea o se ie ua afifi ai. (O lenei faiga, ina ia faatumauina ai le lalelei o le tino, mo le faamoemoe i le toe tu). Ona ave loa lea ua tanu i le vevela o le oneone. O lenei faiga ua taua o le Mami, (Mummies). E faapea se mau, e oo mai i taimi na atualalaina ai Iakopo ma Iosefa, ua faia faapitoa lava lenei sauniga na o le auga Farao.

I ona po nei, ou te manatu foi ua laugatasia uma ai le lalolagi, ua faapena foi i fale maliu i totonu o Samoa. Ua mautinoa ai, ua faaaogaina mea manogi, ma vailaau faapitoa e faatino ai le faamoemoe.

(Mai le Faatonu: Fai mai ua silia i le 30 maliu ua mae'a ona faaliu efuefuina i le fale maliu i Tafaigata/Falelauniu).

A Page for Youth

ITULAU MO TUPULAGA TALAVOU

O se Tina mai Anamua Anamua lava

“O le tama nei na ou tatalo atu ai....O a’u foi ua ou tuuina atu o ia i le Alii i aso uma e ola ai o ia.” (1 Samuelu 1: 27-28)

O le talitonuga o Hana o le avea ma tina o se mea taua tele.

E moni na soifua mai o ia anamua anamua lava a o na o le tasi le galuega a le tina - o le avea ma tina o tamaiti, poo le aiga ma le tausiga o tamaiti. A ua ese foi nei aso. E iai nisi tama’ita’i ua fiafia lava latou i le leai o ni a latou fanau. Peitai e le’i faapea Hana, e le’i fiafia i le leai o sa na tama. O nei ona po o se tama’ita’i ua le fia avea o ia ma tina o se tamaitiiti, ua fulitua i se faamanuinaga silisili. O le lalolagi o nei ona po e faafetai i tama’ita’i e iai a latou fanau latou te tausi ma siisii ma luelue i o latou moega, ola a’e ma avea ma tagata aoga mo le atunu ma le malo.

E laitiiti lava ni mea tatou te iloa e uiga i le tina o Matini Luteru, peitai tatou te talitonu o ia na ia tausi ma faasusu ma a’oa’o le tama na matua ma avea ma ta’ita’i o le toe fuata’iga o le Eklesia, ma le faavaeina o Eklesia Porotesano.

O Hana o le Tina Tatalo

“O le tama nei na ou tatalo atu ai...” E mafai ona e ta’utino mai faapea na e tatalo mo sau tama?

Talofa i tamaiti na ifo mai i le lalolagi ae le’i tatalo ai o latou tina! E taua tele ma tatau ona tatalo le tama ma le tina mo se la tama, ma talosia a o iai pea i le manava o le tina, ina ia faamanuiaina e le Atua gasologa uma o lona olaga.

Na talitonu Hana e mai le Atua lana tama

Sa talitonu Hana e alofa le Atua i lana tama, ma e iai se feau taua mo ia i lona olaga. O lea na ia tuuina atu ai o ia i le Alii. E matua mativa tagata lava le Eklesia Kerisiano pe a na le tuuina atu e ni tama ma ni tina a latou fanau mo le Alii ma lana Tala Lelei.

O le taimi lelei mo le a’oa’oina o le solofanua, o le taimi o laitiiti. E faapea foi i le tamaitiiti: ‘A’oa’o le tama e tusa ma ona ala, a oo ina matua e le toe te’ a ese ai.’

Na manuia le tausiga a Hana i lana tama

Fai mai le Tusi Paia na iloa uma e Isaraelu ua tula’i mai se perofeta. A o Hana na ia faasusuina, o ia na ia tausia ma siisii, ma faamoemoe i lona moega. E lei fanau mai Samuelu o se perofeta. A o le tausiga a lona tina na faavae mai ai le avea ma perofeta.

O le faaaaoaoga taua lava e tatau ona tatou manatua e uiga ia tatou fanau, o le tala ia Aperaamo ma lona uso o Lota. E le’i faamuamuaina e Lota le Atua, o le mea lea na le mafai ai ona ia pulea lana fanau. A o le fanau a Aperaamo na ola mai i latou ma latou ta’ua lo latou tama o Aperaamo o se tagata ua faamanuiaina.

Tama’i Maile fia faatau atu

Sa tu le tamaloa i fafo o le faitoto’ a o lona faleoloa, ma tu’itu’i le pepa oloo tusia ai upu nei i luga o le faitoto’ a: ‘Puppies for Sale’ - Tama’i Maile fia faatau atu. O ituaiga faasalalauga faapea e fiafia tele iai tamaiti, ma o lea ua tu nei se tamaitiiti i le faitoto’ a ma fesili,” E fia le tau o lau tama’i maile?”

Sa tali mai le faatauoloa, “O se mea i le va o le \$30 ma le \$50.”

Na tago ifo le tamaitiiti i lana taga ma to a’e lana tupe ma

faitau, ma fai atu, “E \$2.37 la’u tupe lea e iai. E mafai ona ou matamata i tama’i maile?”

Na ‘ata’ata le tamaloa ma faaili i lana maile ma lana toloa’i. Na vave ona laga mai lana maile o Lady ma lana toloa’i e lima mananaia lava ma taufai tata o latou si’usi’u ma ouou. Ae fai si mamao i tua le mea o tamo’emo’e mai ai le isi maile. E ‘etu’etu lona vae. Na vave lava ona oso le alofa o le tamaitiiti i le tama’i maile lea.

faaaauau itulau e sosoo ai

A Page for Youth

ITULAU MO TUPULAGA TALAVOU

O le Faatuatua e pei o le telē o se mauga

E iai nisi e manatu o le faatuatua e tupuga mai i ni vavega; ae toatele foi isi e talitonu o vavega e fanau mai i le faatuatua.

E manaia lava le tala lenei e faamalamalamaina ai lea manatu: E iai se aulotu e i le auvae mauga o se mauga, na latou fausia so latou falesa i lea mea, i se fanua na uili mo le aulotu e se alii mauoloa o le

aulotu. Toe sefulu aso faapaia le falesa fou, ae tu atu le asiiasi fale mai le malo ma fai i le faifeau, e matua tele tele le falesa e le lava le paka ua saunia e le aulotu mo taavale. Ma a le faateleina le paka, e le faatagaina le tatalaina o le falesa mo a latou tapuaiga.

O le faafitali, ua faaaoga uma e le aulotu le fanua mo le falesa, ma ona pau lava lea o le

Tama'i Maile fia faatau atu

Na fesili atu i le tamaloa pe aisea e ‘etu’etu ai le vae, ae tali mai, na su’esu’e e le foma’i manu ma iloa ai, e leai se ponaivi o le sooga o le vae. O le mea lea, o le a ‘etu’etu ai lava i aso uma.

Na matua fiafia le tamaitiiti ma fai atu, “O le tama'i maile lena ou te fia faataua.”

Fai mai le tamaloa, “Leai, e te le faataua le maile lena. ‘A ‘e mana’o iai e mafai ona ave ma oe e leai se tau.”

Na faanoanoa ma ita le tamaitiiti ma faataupupula atu i le tamaloa ma fai atu, “Leai, ou te le mana’o e te aumai fuaina ma au. O le tama'i maile lena e tutusa lelei lona lelei ma le lelei o isi maile. E fia le tau? O lea o le a avatu la'u tupe lea e \$2.37, ae togitogi atu le ta'i .50sene i le masina se'ia oo ina uma le tau

atoa.”

Ae o le la e fai atu lava le tamaloa e ona le faleoloa, “E le tatau ona e faatauina le maile lea. E le mafai ona tamo'e ma lua ta'a'alo e pei ona mafai ona fai e isi maile le la e lelei o latou vae.”

O le taimi lea na tago ifo ai le tamaitiiti ma susu'e i luga le vae o lona ofuvae, ma faaali i le tamaloa lona vae e pi'o, ma oloo sulu ai i totonu se u'amea e fesoasoani i le tau faasa'oga o le vae a o tuputupu a'e, ma fai atu i le tamaloa, “E tutusa lava ma'ua ma le tama'i maile vaepi'o lea, e leaga uma o ma vae. A ma ta'a'alo, o le a malamalama le isi i le isi i le mafuaaga e setusetu ai, ona e taufai pipi'o uma o ma vae.”

tusia e Dan Clark

vaega oloo totoe lea ua tuu mo le paka, a ua le pasia e le asiiasi fale. Vagana le mauga, o se vaega o le fanua o le aulotu. A o ai e iai ni ana miliona e na te suaeseina ai le mauga?

Ae le'i faavaivaia ai le loto o le faifeau a le aulotu. Ina ua mae'a le sauniga i le Aso Sa na sosoo ai, ona tula'i mai ai lea o le faifeau ma faasilasila faapea: “Ia, ua mae'a lo tatou falesa. Malo le galulue. Malo le loto tetete. A o le faalavelave, ua le pasia le tatou galuega ona e laitiiti le mea e paka ai taavale. Ua tele naunau lo tatou falesa, ae laitiiti le mea e paka ai taavale.

O le mea lea, nanei i le afiafi, o le a fai ai se tatou fono tatalo, tatou e iai so latou faatuatua e pei o le maualuga o le mauga lea e tu mai i lo tatou fanua; le ituaiga faatuatua lea e mafai ai ona siitia mauga.....”

Ua fai le fono tatalo, ma tatalo ai le aulotu i le Atua ina ia alofa mai ma ave'ese le mauga lea o tu mai, ae se'i faaaoga le vaega lea o le fanua e faalautele atu iai le paka mo taavale. Ma ia alofa mai foi, ma aumai ni tupe e faalauleleina ai, ma faata, le vaega lava lea mo le paka, aua ua matua leai lava ni a latou tupe o totoe ua alu uma i le fauina o lo latou malumalu tapua'i.

Ua atoa le tolu itula o tatalo le aulotu, ona faai'u lea i le tatalo a le faifeau. Ona ia folafola atu lea, o le a tatalaina lava lo latou falesa e pei ona atofaina. “Ou te talitonu ma faatuatua i le Atua, na te le tuulafoaina tatou.”

Ae a faapefea nei e le o pasia e le pasi fale?

O le taeao o le Aso Gafua na sosoo ai, oloo galue le faifeau i

faaauau itulau e sosoo ai

Ia Manuia Outou Matua ae ola matou le Fanau

O moomooga ia o fanau e fia sefulu afe, na alalaga ai i totonu o malumalu i Samoa i lo latou Aso Sa o Tamaiti, e pei ona masani ai. (*mai le itulau muamua*)

Ua fia sefulu nei tausaga talu ona amata le Lotu a Tamaiti, o fai lava le alaga lea a a tatou fanau, i lo latou aso faapitoa, pe a uma ona fai o le tauloto, poo se pese, poo se tala, poo se lauga, ona faamanuia mai lea ia oe le tama, poo oe le tina, ma matua uma ma le faapotopotoga atoa: “*Ia manuia outou matua, ae ola matou le*

fanau!”

E pepese fiafia mai i o tatou luma, e faamananaia mai ia tatou, ma manatu lava le atalii ia ma le afafine, o ia e aupito sili ona aulelei i le vaai a lona tama ma lona tina. O lona ofu e aupito sili ona manaia i lo le ofu o le isi tamaitiiti.

E mana’o e te vaai lelei atu ia ia a o fai mai lana tauloto, pe se

siva, poo se lauga, ma e fiafia ia te ia. Ma e faamalo atu ia te ia: “Lelei tele si a’u tama!”

E matauina lava e tamaiti le faapitoa ona fai i latou i lea aso. O o latou ofu fou papa’e, o lipine ma ‘ula; o fusiuia o tama ma tautaliga o teine.

Ma pale!

Ma mea’ai!

Ua fai faapitoa uma nei mea, e sami/faamanatu ai le meaalofa a le Atua ua aumai mo tatou matua. E faamat’eti’e ai le tamaitiiti na fetalai ai Iesu: “Tuu mai tamaiti e o mai ia te a’u, aua e faapei o i latou nei e oi le malo o le Atua.” E mata’utia lenei mea ua fetalai ai Iesu. Fai mai e pei o tamaiti ia, a tatou fanau, i latou oi le malo o le Atua.

Tusa lava pe na o le mimigi solo o lau tama, ma matamuli e fai le tauloto, ‘aua e te popole oe le tina, o aga uma lava na o lauga a tamaiti. Faafetai oloo iai se tamaitiiti oloo mimigi solo i ou lima, ma lau tausiga. A mafai lava ona tu mai i luma o le faapotopotoga e toatele, o lana lauga poo lana tauloto lava lena. Ua matamata atu le faapotopotoga i le tamaitiiti oloo ola manuia ona o lau tausiga lelei, le tamaitiiti na aumai e le Atua mo oe.

I se tasi itu, o le Aso Sa o Tamaiti, o le **aso o le faaaliga o a tatou fanau mai le Alii, ma o le aso foi tatou te toe ofoina atu ai a tatou fanau na maua mai ia te ia, mo ia!** O le aso foi e faamautu atili ai le upu mai le Tusi: **a’oa’o le tama e tusa ma ona ala, a oo ina matua, e le toe te’ā ese ai.**

O le mea lea, aua e te fasia lau tama ma fepo ma vau ina ia

faaauau itulau e 19

O le Faatuatua e pei o le tele o se mauga

faaauau mai le itulau e 11
lona ofisa, ae tu’itu’i atu se tagata. “Ia, ulufale mai ia!” o le valaaau lea a le faifeau ma faataupupula i le faitoto’ā.

Na tu mai i le faitotoa se tamaloa, o le fomeni o se galuega o fai e le mamao ma le fanua o le aulotu. Na to’ese lona pulou ‘apa, ma fai mai i le faifeau, “Malie lau Susuga, ua ou faalavelave mai. Ou te sau i le kamupani lea e fausia le faleoloa tele lea e le mamao tele atu ma outou. Oloo matou mana’omia ai se eleele e tanu ai le fanua. A mafai ona matou suaina atu le tou mauga lea, ua

faigofie le matou galuega. A uma ona matou suaina, ona matou toe faalauleleiina lea, ma faata.”

O le Aso Sa na sosoo ai na lolotu ai le aulotu i le latou falesa fou e pei ona folafola e le latou faifeau, ae paka a latou taavale i le paka tele ua uma ona faataina i le mea sa tu ai le mauga.

Fai mai nisi, o le faatuatua e fanau mai vasega. Ae toatele e talitonu, o vasega e fanau mai i le faatuatua - e mafai ai ona siitia mauga! Ma faalaulelei ma faata le paka e aunoa ma se tupe e alu ai.

O le Mafuaaga o le Pese: "When the Roll is Called up Yonder"

O le mautinoa ma le to'a filemu lelei o le mafaufau ona o le faaaliga oloo iai lo tatou maota tumau i le lagi, o se mea lava lea e taula'i iai le faamoemoe o le Kerisiano faatuatua i le Alii Faaola.

Fai mai e na'o i latou e mautu lo latou talitonuga i le manuia i le lagi pe a i'u lenei ola, o i latou ia e latou te maua se olaga manumalo moni a o iai i lenei lalolagi. O le felata'i o le tatou mafutaga ma Keriso, o le amataga lava lea o le tatou aga'iga'i atu i maota ua uma ona saunia mo i tatou pe a i'u lenei ola: "E tele mea e nonofo ai i le maota o lo'u Tama, a na leai ou te alu ma sauni se mea e nonofo ai outou..."

O le pese lenei: "When the roll is called up yonder", na tusia ma faanotaina e James M. Black, o se tagata lotu Metotisi, o se faiaoga musika, ma o se tasi sa na tusia ma lolomiina le tele o nisi pese faale-Tala Lelei. O lana faaaliga lenei i le mafuaaga na tusia ai lenei pese.

O le vai taimi na faiaoga ai i le A'oga Aso Sa, o ia foi o le peresitene i lea taimi o le 'au talavou, na ia feiloai ai i se teineitiiti e 14 ona tausaga, e le lelei ni ona ofu sa fai ma o ia o se afafine o se tagata inu'ava. Na talia e lenei teineitiiti le valaau a Semisi Peleki la te o i le a'oga a le au talavou ma A'oga Aso Sa. O se tasi afiafa a o faasolo le valaau i tama ma teine e tauloto mai se fuaiupu o

le Tusi Paia, na oo atu le valaau i le teineitiiti, ae leai sa na fuaiupu na fai mai. Ona talanoa lea Semisi i le faanoanoa e oo ia te ia pe a oo i le taimi e valaau mai ai igoa i le Tusi o le Ola a le Tama'i Mamoe, ae le o iai lou igoa.

Ina ua oo Semisi i lona aiga i lea po, na iloa mai e lona to'alua e pei o iai se mea o mamafa i

lona mafaufau. O le taimi lea na amata manino ai i lona mafaufau upu o lenei pese. Ua nofo i lalo ma tusi, ma faanota, ma alu atu i le piano, ma taina le pese.

Ae faato'a uma ona tusia le pese atoa ina ua ia maua tala ua maliu si teineitiiti i le sefulu aso mulimuli ane. Talu mai ona lomia lenei pese i le tausaga e 1894, ua matua toatele lava Kerisiano ua faamafanafanaina o latou loto e upu ma le fati o lenei pese. Ma faalototeleina foi o latou loto i le vaavaai atu lea i le manuia i le lagi pe a uma lenei ola.

"When the Roll is Called up Yonder"

When the trumpet of the Lord shall sound and time shall be no more, and the morning breaks eternal, bright and fair-when the saved of earth shall gather over on the other shore, and the roll is called up yonder I'll be there.

On that bright and cloudless morning when the dead in Christ shall rise and the glory of His resurrection share-when the chosen ones shall gather to their home beyond the skies, and the roll is called up yonder I'll be there.

Let us labour for the Master from the dawn till setting sun, let us talk of all His wondrous love and care, then when all of life is over and our work on earth is done, and the roll is called up yonder I'll be there.

Chorus: When the roll is called up yonder, when the roll is called up yonder, when the roll is called up yonder, when the roll is called up yonder I'll be there.

James M. Black, 1856 - 1938

Service

At the close of life, the question will be not, How much have you got? but how much have you given? not How much have you won? but How much have you done? not How much have you saved? but How much have you sacrificed? it will be How much have you loved and served, not How much were you honoured?

by Nathan C. Shaeffer

O le Malosi o Manatu o Tagata Lautele

O finagalo, poo manatu, poo taofi o tagata lautele tuu faatasi, (public opinion), o mafaufauga lava ia o soo se sosaiete o tagata, ituaiga tagata, poo se atunu.

I le tala atoa ia Iesu Keriso lo tatou Alii Faaola, e lua ni faaaliga manino ma le ogaoga o ia finagalo: muamua: o lona maliu; ma lona lua: o ana a'oa'oga. Na fesili atu Pilato i le motu o tagata pe o le a le mea latou te manana'o iai ia faia ia Iesu, o le latou tali - faasatauro ia te ia! A o le taimi foi lea oloo alalaga le motu o tagata: 'Faasatauro ia te ia! Faasatauro ia te ia!' Ua tuu e Pilato e fai mai e le motu o tagata le faaiuga ina ia 'aua ne'i tuua'ia ai o ia.

E aunoa ma se 'i'ite o Pilato o le tagata o le a ia faasatauroina o le a toe tu mai ma ia fuli atoa le lalolagi i ana a'oa'oga, ma liliu mai tagata e talitonu ma mulimuli ia te ia, ma latou faato'ilaloina le malo malosi o Roma oloo ia tautua iai.

O aoaoga a Iesu Keriso oloo tumu ai le vaega lona lua o le Tusi Paia - le Feagaiga Fou. O tala i le tagata e igoa ia Iesu; o ona uiga, o lona tagata, o ana mea na fai; o le lolofi atu o tagata ma taumulimuli ia te ia i le fia faalogologo i ana fetalaiga; o le fe'au na afio mai ai o ia; o fea e sau ai; o lona tali atu i tuua'iga ma faitioga a le lotu Iutaia; o lona faaeaeaina o tagata e oo i tama'ita'i; o le taua ia te ia o tamaiti; o lona alofa i tagata ua faasinasinomia ma 'alofia e tagata; o lona

faamagaloina o agasala; o ana faamalologa, atoa ma lona faasatauroina.

O le Feagaiga Fou e maua ai ma tala i ulua'i toa o le Tala Lelei, lo latou ola to'ilalo a ua toe fuata'ina, ma avea i latou ma fetu pupula e molimoli atu a'oa'oga a lo latou Alii ma lana faaolataga mo tagata uma o le lalolagi - e le na o le Iutaia ae mo tagata o nuu ese.

A na le talitonuina e tagata lautele Iesu ma ana a'oa'oga, ma lona maliu ma lona toe tu mai, e le oo atu le Tala Lelei i pa'usisi uma o le lalolagi, e pei o Samoa.

I le talafaasolopito o le lalolagi, sa iai ni ta'ita'i totoa, e pei foi o Iesu, na latou liua mafaufauga o tagata lautele, ma suia ai ni faiga sa iai e le fetaui ma le soifua o tagata. E pei o Aperaamo Linikone le peresitene o Amerika na taulamua i taumafaiga e faasaoloto tagata uli mai le nofo pologa, poo le faatauina atu e fai ma pologa.

Ae iai foi ta'ita'i iloga sa latou ta'ita'i seseina o latou tagata, e pei o Hitila o Siamani lea na mafua ai ona amata le Taua Lonalu a le Lalolagi - 1939-1945, lea na maliliu ai tagata e sili i le 50 miliona.

O le Eklesia Kerisiano sa amusia ma sauaina ma susunuolaina ona tagata i le ulua'i senituri o le Tala Lelei, na avea mulimuli ane ma faaolataga, faaletino ma faaleagaga, mo tagata o le

lalolagi - uliuli pe pa'epa'e, mumu pe 'ena'ena. O se mea fou i tagata uiga o a'oa'oga a Iesu na latou maua ai le saolotoga ma le le faailoga tagata. O se mea fou i tagata le faamagaloi atu i e ita mai ia te i latou, le alofa i lou tuaoi tusa lava pe inoino mai ia te oe. O ni uiga fou, na faatuupuina ai le fealofani ma le ola fetausia'i, e pei o oe lava ia te oe.

O le Tala Lelei ia Keriso ua na faasa'olotoina le tagata e fai lana lava filifiliga sa'oloto i le mea e mana'o ma talitonu iai. E le faamalosia le tagata. E tuu lava i lana filifiliga saoloto. Ma o le mea lena ua silia ai i le 2,000 tausaga o malosi pea le Eklesia Kerisiano i le lalolagi.

A manatua pea e le Eklesia lana misiona o le faaolaina o tagata ma faaleleia o latou soifua e pei ona a'oa'o mai Iesu, tatou te le popole i le lumana'i o le Eklesia. Ae a tatou faatamala i le misiona lea.....

Afemata T. Apelu Aiavao

Loneliness

The cure for loneliness is not a pill or suicide. It is a person. The lonely needs a person or persons, someone with whom he can share his dreams, his dreads, his disappointments....The lonely person cannot wait for another to enter his life and dispel the loneliness. He must, first, begin the journey into another's life, through service, caring, and helping. Then, chances are, he will find his loneliness vanishing.. And he will probably have filled another's lonely hours too.

John Gibson

O le Sue'su'ega ia Mareko

Saunia e

Fuaao Fetalaiga Fuimaono

O ai Mareko?

O Mareko o lona tina o Maria, ae le o maua ni faamaumauga i lona tama (Galuega 12:12) O ia lava o le tusitala o le tusi lenei ua faaigoaina “O LE EVAGELIA A MAREKO”. E lua ona igoa oloo faaaogaina i le Tusi Paia, o Ioane ma Mareko (Galuega 12: 25; 15: 37; 13: 5, 13; 15: 39), ae oloo mafuli le faaaaogaina o le igoa Mareko i tusitusiga a le apostolo o Paulo (Kolose 4: 10; Filemoni 1: 24; 2 Timoteo 4: 11)

Oloo faamauina o Ioane Mareko e le o se soo o Iesu (Mataio 10: 2-4), ‘a o ia sa avea ma fesoasoani ia Paulo ma Panapa i le malaga muamua faamisionare a Paulo (Galuega 13:5). O Mareko, (Marcus) o le igoa i le gagana Latina (Roma), a o Ioane o le igoa i le gagana Eperu ua faauigaina - “Alofa tunoa o le Atua”.

Faamaumauga poo le Talaaga o le Tusi o Mareko

Oloo faamauina o le mavae o le oti o Peteru na tusia ai le tusi lenei o Mareko, ona oloo toatele le ‘au su’esu’e o le Tusi Paia, i le talitonuga, o Mareko o se tasi o tagata sa mafanafana le la mafutaga ma Peteru, aua sa ta’u o ia o le atalii o Peteru (1 Peteru 5: 13), ma o ia foi lea sa ‘avea ma faaliliu upu ia Peteru a o iai i le galuega. O lona uiga, ua tatou iloa o soo se mafutaga lava

faaleuo, e tele ina talatala ma faailoa ai mea lilo, ma mea taua e pei o ni a’oa’oga, tala i vavega ma ni vaaiga ofoofogia sa maua mai i se isi tagata, e pei o le tamaoaiga faaleagaga o Peteru na maua mai ia Iesu, ma tala i vavega ma saunoaga a Iesu e uiga i le malo o le Atua.

O le faasoa lea a Peteru na tusia ma faamauina e Mareko, aemaise o le tele o lauga a Peteru i sauniga eseese sa la auai, lea la ua manatu nisi ua tuufatasia e Mareko ma avea o se tusi aloa’ia. Ua le gata o le faasoa a Peteru, ae le mafai ona faagaloina ai le sao o Paulo i le galuega mo Mareko. E ui sa fulitua Mareko mai ia Paulo (Galuega 13:13, 15:38), ae peitai na mulimuli ane toe faatasia foi i la’ua i Roma (Kolose 4:10). O le isi foi la mau tatou te iloa ai, o Ioane Mareko sa ia muamua ona iloa Iesu ma mulimuli ai, e ui lava e le’i faamauina o se soo ae oloo ia ta’utino mai lava lona auai i le po na faalata ma pu’eina ai Iesu. (Mareko 14:51-52).

I le vaai lautele i le tapenaga o le tusi lenei “O LE EVAGELIA A MAREKO”, o se galuega sa faia i lona taimi sa’o a o feagai le ulua’i Eklesia ma lu’itau o le ola finau mo le tala’iinna o le finagalo o le Atua. E faapea le molimau, na uma loa ona tusia ma tuufatasia le tusi lenei “O LE EVAGELIA A MAREKO”, ae osofa’ia loa fo’i e Roma le aai o Ierusalem ma toe faatafunaina le malumalu, ma e oo mai lava la i le taimi nei e le’i toe fausiaina lava.

O le nofoaga la sa faapena ona faia ai lenei galuega tele a Mareko, i le tusia ma le tuufatasia o lana tusi, o Roma (Smith’s Handi-Reference: Bible Dictionary), ae oloo malosi foi le talitonuga, o le gagana Eleni (Greek) na tusia ai lenei tusi, e ui ina iai foi lona iloa iisi gagana e pei o le gagana Eperu ma le gagana Aramaika.

O le ‘Auga o le tusi a Mareko

O soo se tusi lava e tusia, e iai mafuaaga ma se faamoemoe na afua ai. E faigofie ona malamalamā lea tulaga ona o i tatou o ni tagata e fafia e tusi le tele o itu’aga tusi, ma o nei tusi e faailoa ma faaleo ai ni manatu ma ni lagona fafia, ita, faanoanoa, faamafanafana, a’oa’i, faatonu, faamanatu, ‘aisi, fiau.....

O le tusi a Mareko oloo faapitoa mo tagata Kerisiano oloo i nuu ese (Samuel T. Jordan: *Who’s Who in the Bible*), i fafo atu ma le li’o o tu ma aga ma laufanua o Israelu. O le vaitau o le galuega faamisiona a Iesu, se’ia oo mai i le au apostolo, sa malosi ai lava le va lea o le failogaina o Israelu o le nuu filifilia ma patino mo le Atua, ae faalupe pea i tatou o tagata o nuu ese. O le tusi (Evagelia a Mareko) ua manatu nisi ua ave iai le faamuamua ma le amana’iaina e Mareko o tagata o nuu ese aemaise o le Eklesia i Roma. Oloo ta’ua e Gary M. Burge (The Baker Illustrated Bible Commentary), ia’augia matagofie oloo momoli e Mareko mo le Eklesia Kerisiano i Roma ma nai tagata Kerisiano i isi Eklesia e pei o faaauau itulau e sosoo ai

Pepa mai le Mafutaga Matagaluega Apia

O le Sue'su'ega ia Mareko

le (i) o le Tala Lelei ia Iesu Keriso, (ii) Faamafanafana i tagata Kerisiano oloo sauaina ona o le Tala Lelei; (iii) ia tumau i le faatuatua; (iv) o le uiga o le satauro o Keriso.

E pei ona ta'ua le faamoemoe o Mareko mo ia Ekalesia, oloo faamamafa ai lana talanoa i nisi o tu ma aga e patino i tagata Eperu (Mareko 7:2-4; 15:42), lona uiga e le o se faafitauli mo latou ae o ia vaega oloo faailoa mai e Mareko, e manino atili ai le le tau faamatalaina i tagata Eperu, aua o le latou lea aganuu ua masani ai. O le tasi lea itu ua mafua ai ona laitiiti ma puupuu le tusi a Mareko mai i tusi a Mataio ma Luka, ona sa tusia ma faamauinna na o vavega, faataoto ma aoaoga a Iesu, ae taatia ma ‘ave ese le tele o poloaiga mai i le Feagaiga Tuai o mea ia ua alaga tatau mo na o tagata lava o Isarael.

O alaga'oa o le tusi a Ioane

Ua mautinoa pea i sa'ililiga i tusi a le aufai evagelia, o Mareko lava le ulua'i tusi na muamua ona tusia. Ua mautu lea talitonuga ona ua maua i suesuega, o le 95% o le Evagelia a Mataio ma Luka na faaaogaina ai le tusi lenei a Mareko, ae o le puna o faamatalaga o le tusi a Mareko, na maua mai ia Peteru ma Paulo, e pei ona faailoa atu muamua ia le avea o Mareko ma faaliliu upu ia Peteru ma le fesoasoani a lana uo mamae o Paulo.

O nai Lu'itau a Mareko

O le ogatotonu lea ma le fatu o le galuega ma le tusi a Mareko, o Iesu. Ua folafola ma faailoa e Mareko i le Ekalesia, ia faigata ma puapuaga e tele o le a feagai ma i latou, i tulaga o le sauaina, ma e foliga mai ai, o le ola ofoina mo le Atua e le faigofie ma saogalemu. Ua faaalia lea itu e Mareko ona o lona talitonuga, ia nofo sauni iai le Au Kerisiano ma tapena iai lo latou ola faatuatua ma le alofa moni e molimau le Tala Lelei ia Iesu Keriso (Mareko 8:338; 13:9-13).

O le isi foi itu ua faailoa e le tusitala, o le faamoemoe ma le taunuuga o le faiga filifiliga a le tagata mo le ola ofoina mo Iesu ma lana Tala Lelei. Ua saunoa manino Iesu i lona au sooo ma le motu o tagata, o ai se fia mulimuli ia te ia, ia faafiti o ia ia te ia, ma ave e ia lona satauro. O le faalauteleina o le finagalo o Iesu, oloo ia lu'iina ai le tagata i le ola e faapelepele mo ia lava, e leai se manuia e maua, na o le ola e ofoina ma ma'umau mo Iesu ma lana Tala Lelei e faasaoina ma faamanuia iai le Atua. (Mareko 8:34-38).

Ua manatu foi Mareko i le olaga ofoina ma le faalavelave mai o le mafutaga faaleaiga ma le taua o le tamaoa'iga i le tagata, aua o le sini tau'ave lea o le tagata ia ola galue, ae o lea ua saunoa manino Iesu, afai e te tuua na mea uma, o le fale, uso, tuafafine, tama, tina, fanau ma fanua ae tuu atu atoa le malosi ma le ola e auauna ai ia te ia ma le Tala Lelei, ona

faaselau lea ona maua o na mea uma, ae o le sili o na mea, o le maua o le ola e faavavau. (Mareko 10:30). E le faapea la ua ta'u leaogaina e Iesu le tulaga o le saofa'iga mamalu i totonu o aiga, ae o se laasaga e mafaufau iai le tagata, i gata lona faamoemoe i le lotoifale o le aiga, ae ao ona ave le faamamafa ma le faamuamua i le Atua, aemaise lava o mea ua ta'ua e mavae ma mou atu, a o le ola e favavau o le ute lea ma le taunuuga o mea uma o lenei olaga, ma le faamoemoe o le Atua mo lana tagata.

O le isi vaega taua ua faailoa mai e Mareko, o le loto faamaualuga o le tagata i le va ma le isi tagata, ua leiloa ai le ava fatafata ae ua tausili i tulaga o mamalu ma le aloa'ia i totonu o sosaiete. O isi ia itu tetele o le olaga ua malosi mai lava ma ua foliga mai o le tele o le mamalu ma le aloa'ia o le tagata, ona tele lea o lona faaaloalogia e tagata, ae laitiiti le faaaloalo i le Atua, ona manatu lea o Mareko, e lelei le matua'i fofola iai aoaoga ma le finagalo o Iesu i le vaivaiga lea, o ai ua sauni ma tapena lona ola mo le galuega a le Atua, e ao ona maua le loto maulalo ma lona ta'u faatauvuaina o lona lava tagata. O ai lava e fia sili i totonu o se sosaiete poo le Ekalesia, e ao ina mua'i avea ma auauna, o se fia muamua, ia fai ma tautua. O le saunoaga lea a Iesu e tusa ma le mataupu a le fanau a Sepetaio, o Ioane ma Iakopo i lo la manao e nonofo i le itu taumatau ma le itu tauagavale o Iesu. O se faala'e'i au la mo le Ekalesia, o le ola auauna mo isi tagata, e sili *faaauau itulau e sosoo ai*

O le Sue'su'ega ia Mareko

atu ona mamalu i le Atua, aua foi o le faamoemoe atoa lea o le afio mai o Iesu le Alo o le Atua i lenei lalolagi, ia ‘avea o ia o se faaa’oa’o i le olaga auauna mo isi tagata, lea lava na taunu lea soifua auauna o Iesu i le maliu ona o le faaolataga mo tagata agasala (Mareko 10:43-45).

Lagi Soifua o le Molimau

O le galuega a Mareko, e atagia mai lona fiafia e faamatala ma faailoa vavega na faia e Iesu. O se laasaga faigofie e vave ai ona liliu le loto o le tagata le talitonu i le Atua, pe afai ae faalogo ma vaai i ia galuega ofoofogia na faia. Ua faamatalaina e nisi ia le Evagelia lenei a Mareko, o se Tusi ua tele i le faamatalaina o gaoioiga ae laiti i aoaoga (Mark’s is the Gospel of action), ua fausia lea manatu i le sefulu ma le valu tala i vavega (miracles) na faia e Iesu, ua ia faailoa mai: (Mareko 1:21-28, 1:29-31, 1:40-42, 2:1-12, 3:1-5, 4:35-41, 5:1-13, 5:25-34, 5:35-42, 6:41-44, 6:51-52, 7:24-30, 7:31-35, 8:5-8, 8:22-26, 9:25-29, 10:46-52, 11:20-21). Ua tutusa ma le aofai o tala i vavega oloo faamatalaina e Mataio ma Luka.

E foliga mai la i le tusi lenei a Mareko, ua taunu iai se tasi o fuaitau masanie leotele galuega nai lo upu.....pe ‘a fua iai na o le fa ia faataoto oloo ia aumaia, lea ua tuufaatasia i totonu o le mata’upu e 4 (Mareko 4:1-9, 13-20; 21-25; 26-29; 30-32).

E manatu foi le pepa, o se

faatupu manatu lea mo i tatou a o iai i le galuega auauna ma le tautua ile Ekalesia. E taua upu, i lona tulaga o le faamalosi ma faala’ei’au, ae o galuega faatino e sili atu lea mo le tagata molimau.

La’ei o le Galuega

Ua tuusa’o le amataga a Mareko i le galuega a Ioane ma le papatisoina o Iesu i le vaitafe o le Ioritana, ona faasolo mai lea o lana molimau i vavega ma nisi o vaaiga i ‘a’ai ma faoa’a’ai i totonu o Kalilaia mai i le Mareko 1-12 ae o le Mareko 13, o la’ei matagofie ia o le galuega. O lea ua faailo ma talatalapipi mamanu eseese e filitagaga iai le tagata galue, e tapena ma mafaufau loloto iai, pe talia pe leai. Ua fofola e Iesu le taunuuga o mea uma, mai le teena ma le fenumia’i, e le mafai ona faagaloina, aua e oo lava i le li’o o le aiga e ogoga ona mafatiaga, e tuufesili foi le mafaufau poo a uiga o ia mea, ae o le tali manino ua saunoa iai le Aliii o Iesu.....”Ina mataala ia”.

Aotelega

E manatu ua manino ma malamalamama le tulaga aoao tetele o lenei tusi i lona faamoemoe autu e pei ona taumafai e faamatalatalaina atu, i le agaga lotunuu ma le mapo Atua o Mareko. Ua ia fofola ai se feau talafeagai mo le au uso Kerisiano, ua le gata i Ekalesia i nuu ese, sa taula’i iai lenei fe’au, ae ua faasopolia ma o tatou tagata i lana feau

faamafanafana ma le faamatala loto, i le ola auauna ma le ola tautua mo le Atua ma lona finagalo. I le matau ma le vaai toto’ a i le agaga o le feau a Mareko, o fea lava e aga’i iai taaviliga o le soifuaga sa feagai ma le uluai Ekalesia, a o le mea mautinoa o fuafuaga alualu mamao a le Atua mo le manuia o le tagata i le ola e faavavau poo lona malo.

Upu Faai’u

O Iesu na fetalai: “O atu ia outou i le lalolagi uma, ina tala’i atu ai le Tala Lelei i tagata uma lava”. O tagata uma lava ua talitonu ma faatutua i le mana silisili’ese ma le alofa tunoa o le Atua, o i latou ia ua valaauna mo lona finagalo pa’ia, e tala’i ma logo atu le Tala Lelei o le Faaolataga ua mae’ a ona tapenaina mo tagata uma lava.

O nai seuseu na sa mafai ona aoina mai, atonu e iai se aoga mo lau ta’igafi mo lau magalafu faaleagaga i se aso.

Afai foi ua le malie lou galala i se vai malu na asua’e e la outou auauna, o le galuega e fau faatasi, ae talitonu le manatu, ia tatou tuutasi ia le faiva o le tamaloa (Pili), i le Atua o ia o le puna vaiola o le ‘oa ma le tamao’ aiga faaleagaga, na te faatumuina la tatou utu i auupega o le Tala Lelei, ina ia fau ma soloi ma osaosa lona malo i ni agaga se tele, ona o lau galuega molimau.

Ia manuia tele le mafutaga.

Ma 'Apa'au e pei o 'Aeto

Na ou vaai atu i le uati i luga a'e o le moega o la'u tama i le falema'i, ma ou mafaufau ma le faanoanoa i le tele o itula talu ona mafatia Riki i le mau moega sa ta'oto ai mai lea taimi i lea taimi i masina e ono o tau togafiti ona manu'a. Ua ou mafaufau i suiga tetele ua oo mai i lona olaga, faapea ma le matou aiga talu ona lavea Riki ina ua so'a lana uilaafi e se taavale laitiiti matua saoasaoa lava.

I luga o le laulau i tafatafa o lona moega oloo tu ai le ata o lona atalii e sefulutasi ona tausaga, o Liki. I le aso na sosoo ma le faalavelave, sa talie ai lava Riki ma Liki ma taaalo fiafia i le matou tafaoga i le matafaga, a o le taimi nei, e leai ma se isi o toe 'ata fiafia.

Ua faaletonu lava le vae agavale o Riki. Ua pepe ona manu'a i lona tau'au ma ona mata na o nai ma'ilala o totoe ai. Peitai o le manu'a i luga a'e o lona tuli agavale, lea na salia ai ni 'a'ano i luga a'e o le tuli, ua le pe. Ua faalua nei ona ta'oto Riki, iva itula o fai le ta'otoga faigata e tasi, e toina mai ai se maso mai le manava, poo le tau'au, poo le papatua, ma su'i faapipii i le mea lea na salia. Ua faalua foi ona teena e lona tino le maso faapipii na toina mai. Ua manatu nei foma'i, a toe fai se isi ta'otoga ae le manuia, ona tipi loa lea o le vae o Riki i luga a'e o lona tuli.

Ua na o le tagi nei o Riki ma fai mai ia a'u, "Ou te le toe mafai ona tatali tiga o se isi ta'otoga. Ou te masalo e oo ina

ou oti i le ta'otoga lena pe a fai." O le tala lea a Riki ua na o le tagi ma fai mai pea lava pea ia a'u. Ua le suia foi i a'u upu faalototele le musu o Riki e toe ta'oto. Ua fefe! Ua popole! Ua avea foi le fefe o Riki i se isi ta'otoga ua amata ai ona vaivai o lo'u foi loto. E ui lava na ou tatalo mai lava ina ua manu'a Riki i le taavale ina ia toe malosi, ae ua amata ona ou masalosalo e le lava a'u tatalo o fai i le Atua. Ona ou talosaga ai lea i nisi o le matou aulotu, o ni a'u uo, ina ia alolofa mai ma tatalo mo Riki ma lona ma'i. Ua oso mai foi lo'u talitonu e le gata i le toe faafo'i mai o le malosi atoatoa o le tino o Riki, a o ona lagona faaleagaga.

O tagata sa asiisi atu ia Riki sa latou fai atu iai, e matua ofo latou ona o lona sao mai le faalavelave. Ae sa talitonu Riki i uluui aso talu ona lavea i le taavale, e le taumate e iai se fe'au mo ia mai le Atua na ala ai ona faasaoina lona ola. Ae ina ua mae'a ta'otoga e lua e le manuia, ma faaauau ai lava ona ta'oto i le falemai mo nisi masina, ona amata ai loa lea ona sui ona lagona ma mafaufau, sa tatau lava ona oti i le faalavelave.

Ua amata nei ona ou pesepese i tafatafa o lona moega, o mai foi ona uso e toatolu ma fai a latou tala malie iai ma faitau iai tusi komi, a ua le mafai ona sua ai le faanoanoa o Riki.

Ona oo ai loa lea i se isi aso, ua ou sau ma la'u Tusi Paia ma faitau leotole. Na amata e le fia faalogologo mai iai Riki. O le aso na sosoo ai, na ou fai fataina

ai le Isaia 40: f31:

"A o e faatalitali i le Alii, e toe faafouina lo latou malosi; latou te sii a'e apaau e pei o aeto; latou te femo'e, ae le vaivai; latou te savavali, ae le tigaina."

Na ou vaai atu ua sui uiga o Riki ina ua mae'a ona ou fai fataina le Tusi Paia. Ona ou manatua ai lea o le faatagata o le aeto oloo i luga o la'u laulau i le matou fale, oloo tusia ai i luma upu lava ia mai le Isaia e 40:31. O le aso na sosoo ai na ou aumaia ai ma tuu i luga o le laulau a Riki i tafatafa o lona moega. Ina ua ou toe asiisi atu iai, ua matua sui lava ona foliga. Na ou fesili atu i tausima'i ae fai mai, o taimi uma lava e ui ane ai, e faalogo mai lava o tauloto e Riki upu ia: **"A o e faatalitali i le Alii, e toe faafouina lo latou malosi; latou te sii a'e apaau e pei o aeto, latou te femo'e, ae le vaivai; latou te savavali, ae le tigaina."**

O le aso na sosoo ai na fai atu ai Riki i fomai ua ia sauni mo lona ta'otoga lona tolu.

Ina ua oo i le aso e toe ta'oto ai Riki, na o le 'ata'ata ma talanoa i fomai. A ua toatele atu foma'i i le ta'otoga lea i lo taimi o ta'otoga muamua e lua. A o le'i faia le ta'otoga ae fai atu Riki i foma'i, "Aua tou te popole, o le a lelei atoatoa mea uma. Oloo auai mai le Atua."

Na manuia le ta'otoga. Ua toe atoatoa nei le malosi o Riki. Ua faatau ese atu lana uilaafi. Ua talitonu o ia i le mana o talosaga. Ua fai foi ma ana masani le faatau o tama'i aeto mai faleoloa ma tuu i lona potu.

tusia e Diana L. James,
faamatalaina e
Afemata T. Apelu Aiavao

E tatau ona e fanaufouina

E mafai ona e aumaia le puaa oloo lopala, aumai faata'e lelei i lou faleta'ele, aumai se pulumu ma matua olo ese ai ona palapala. A uma lena, aumai se solo i le solo ai lona tino. Aumai ni fagu sausau matua u'u ai ia sasala lona manogi sausau ae le toe manogi puaa. Aumai ma se lipine i le 'asoia i lona ua.

Ona e tu lea ma e matamata i lau puaa, oi, ua matua manaia lava.

Peitai, o le taimi lava e te tatala ai le faitotoa o lou faleta'ele, e masausau atu ai lau puaa, tamo'e i fafo ma faasasa'o i le pala sa lopala ai, ma toe taafilifili ai.

O le faalavelave, na e faata'e

le tino o le puaa, ae te le'i sua lona natura. O le natura lava o le puaa ia, o le alu i le vaivai palapala, ua taafilifili ai, aua e malu ai lona tino vevela.

E faapena foi pe afai e te avea se tamaloa inu 'ava ma 'ona soo ma palauvale i luma o le fale'ava e faafesaga'i ma le falesa, 'ave i se lotu i le Aso Sa. Avatu iai ni ou lavalava lelei e la'e'i ai, ma se fusiuia, ma se peleue. Selu lelei le ulu. Oi, ua matua aulelei lava. A faasolo mai le peleti o le sene, ona tago lea ua lafo iai se tupe tele, ma toe nofo filemu ma vaavaai i luma i le faifeau.

Ae a fo'i i lona fale, ona toe tago foi lea i le fagupia, tatala,

ma toe amata ona inu. Se'ia oo ina 'ona, palauvale, 'ote i tamaiti ma lana ava. Pe fasi foi le ava ona ua nofo ma faaaoga se tupe na ia tuuese mo se isi ana fagupia.

O le faalavelave, e le'i sua lona natura. E le'i faafouina lona tagata. E le'i fanaufouina. E ui lava na lavalava mama i le Aso Sa, ma matua foliga mai i se tagata lelei, pei se agelu, ae tumau lava ona uiga e pei o se puaa. Na ona talai lava o lavalava lotu, alu toe inu'ava, palauvale, fasi le ava. Ua toe fo'i lava i le palapala sa lopala ai, ma toe ola ai. Seiloga lava ua sui lona natura, ona faato'a lelei moni lea. O le mea lena na ala ai ona fetalai Iesu ia Nikotemo, 'E tatau i le tagata ona fanaufouina', toe fanau mai faaleagaga.

tatou, o latou matua ma aiga.

Ae a ou manatua nisi o sauaga e oo ia i latou, sauaga o le sasa ma le lima te te ae manu'anu'a ai, ona ou faanoanoa lea. Poo sauaga mataga e faia e i tatou lava matua - ma faapo'ululu ai le tamaitiiti i le tulimanu, ma tagi 'u'u, ma fefevale,

O le faamanuia a a tatou fanau mo tatou i le Aso Sa o Tamaiti, e faaiu i le laina, ".....ae ola matou le fanau." O o latou moomooga na! O si a latou tagi mai lena ia oe ma a'u o latou matua! I lea tausaga ma lea tausaga o le Lotu a Tamaiti. Ina ia latou maua se ola maloloina lelei ma le manuia, mai o latou matua.

O le lagona, ne'i o tatou manatu mama i le latou alalaga mai, ma talotalo mai:

Ia manuia outou matua ae ola matou le fanau.

Afemata T. Apelu Aiavao

la Manuia Outou Matua ae ola matou le Fanau

mai le itulau e 12

fai le tauloto. O lana tauloto lava lena o lona tu mai i luma o tagata e toatele, ma faamanaia mai ai i lona ofu fou, ma mimita ai. Ia e faatauaina le upu ua fetalai ai Iesu: "Aua e faapei o i latou nei e oi le malo o le Atua." Tamaiti ia, lau tama ma lou afafine, lea ua fetalai iai Iesu, e faapea i latou oi le malo o le Atua. E loto mama; e le 'alu'alua o latou loto; e sa'oloto mai uiga leaga ma lagona leaga o le lalolagi.

O le Lotu a Tamaiti, White Sunday, o lona lua ai lea o sauniga pa'ia a le tatou Ekalesia e le mafai ona le maligi ai o'u

loimata, e pei o le toatele o tatou. O le isi o le Faamanatuga. O le tala i le faaolataga na afio mai Iesu Keriso na te faia mo lo tatou faamagaloga. O ana a'oa'oga, o ana lauga; o ana mea na fai; o lona alofa i sooo se tagata aemaise lava i latou ua tusitusi lima iai lo tatou sosaiete ma amusia ma le papa'i atu iai.

Ma le Lotu a Tamaiti. A ou vaai atu ia i latou - a tatou fanau laiti, o fiafia mai ma pepese, e sagisagi mai e faafafia tatou. Ma tupulaga matutua, ua tele mea e ono o iai, e tosina iai o latou mafaufau, aua ua matutua, a o lea lava e auai i Lotu a Tamaiti, ma faamaopoopo a latou faafafiafaa faaleagaga, mo

Nai Ata o le Lotu a Tamaiti



O moomooga lava e fai pea lava pea i Lotu a Tamaiti uma e a tatou fanau: “Ia Manuia Outou Matua ae ola Matou le Fanau.”

O ata mai le Lotu a Tamaiti a le aulotu EFKS to’alaitiiti i Aleisa Sisifo, oloo tausia e le Susuga Elekosi Viliamu ma le faletua ia Lila.

